

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 418202 22 St
Datum: 10.05.2023. godine

Općinski sud u Tuzli, stečajni sudija Vedran Milašinović, u stečajnom postupku nad imovinom stečajnog dužnika „PROGRES“ d.o.o. fabrika termoplasta, Kladanj ul. Vitalj 1, donio je dana 10.05.2023. godine sljedeće

RJEŠENJE

POZIVAJU SE povjerioci i sva zainteresovana lica da u roku od 30 (trideset) dana od dana objave ovog rješenja u „Službenim novinama FBiH“, na žiro-račun Suda, broj: 132-100-03091233-91 kod NLB banka d.d. Sarajevo, uplate iznos od 13.500,00 KM na ime predujma za pokriće troškova vođenja ovog stečajnog postupka, te da dokaz o uplati dostave sudu.

Ukoliko niko od pozvanih iz stava 1 ovog rješenja ne uplati navedeni iznos u ostavljenom roku i dokaz o uplati ne dostavi sudu, sud će zaključiti stečajni postupak.

Ovo rješenje biće objavljeno u “Službenim novinama FBiH”, oglasnoj ploči ovog suda i web stranici suda-elektronskoj tabli suda.

Obrazloženje

Rješenjem broj: 32 0 St 418202 22 St od dana 07.06.2022. godine otvoren je stečajni postupak nad imovinom dužnika „PROGRES“ d.o.o. Kladanj, fabrika termoplasta, ul. Vitalj 1.

Dana 24.04.2023. godine stečajni upravnik je dostavio izvještaj o provedenom stečaju, završni račun i prijavu nedostatka stečajne mase. U izvještaju je detaljno opisan tok stečajnog postupka sa podacima o unovčenoj imovini i sredstvima ostvarenim unovčenjem. Vrijednost imovine stečajnog dužnika je bila procjenjena na ukupan iznos od 506.627,49 KM, a nakon provedenih prodaja unovčeno je 217.165,13 KM, od čega u korist stečajne mase iznos od 31.539,29 KM i u korist razlučnih povjerilaca iznos od 185.625,84 KM. Prema priznatim razlučnim pravima, razlučni povjerilac Čamdžić Komerc d.o.o. Kladanj je namiren u iznosu od 68.526,84 KM po osnovu kompenzacije, dok će po osnovu uplata biti namireni ostali razlučni povjerioci i to Porezna uprava FBiH u iznosu od 43.854,07 KM, Federalni zavod PIO u iznosu od 64.018,16 KM, Imširović Ibrahim u iznosu od 827,68 KM i Čamdžić Komerc d.o.o. Kladanj u iznosu od 8.399,10 KM (na osnovu uplata ukupan iznos od 117.099,00 KM). Troškovi stečajnog postupka na dan 12.04.2023. godine su iznosila 58.601,16 KM, od čega je plaćeno 18.953,66 KM, dok je neplaćeno 39.647,50 KM. Na računu se nalaze novčana sredstva u iznosu od 156.746,60 KM, od čega se razlučnim povjeriocima ima isplatiti iznos od 117.099,00 KM, dok do tada nastali a neplaćeni troškovi iznose 39.647,50 KM, tako da će troškovi djelimično biti isplaćeni iz raspoloživih novčanih sredstava na računu stečajnog dužnika, dok će dio troškova zbog nedostatka stečajne mase ostati neplaćen i to na teret naknade stečajnom upravniku u iznosu od cca 5.000,00 KM, dok takođe obaveze stečajne mase iznose 8.500,00 KM i odnose se na obavezu prema predlagачu za uplaćeni predujam za prethodni stečajni postupak i stečajni postupak, tako da nedostatak stečajne mase sa junom 2023. godine iznosi cca 13.500,00 KM.

Dana 10.05.2023. godine održana je skupština povjerilaca povodom izvještaja stečajnog upravnika (izvještajno ročište), na kojoj je stečajni upravnik prema prethodno izloženom stanju predložio u konačnici predložio zaključenje stečajnog postupka zbog nedostatka stečajne mase, dok je skupština jednoglasno usvojila izvještaj o ekonomskom stanju stečajnog dužnika i prijedlog za zaključenje stečajnog postupka zbog nedostatka stečajne mase.

Odredbama člana 196 Zakona o stečaju (Objavljeno u "Sl. novine FBiH", br. 53 od 07 jula 2021) je propisano da ako se nakon otvaranja stečajnog postupka ispostavi da stečajna masa nije dovoljna za pokriće troškova stečajnog postupka, stečajni sudija će zaključiti postupak (stav 1), stečajni postupak se ne zaključuje ako se predujmi dovoljan novčani iznos (stav 2), a na postupak zaključenja stečajnog postupka primjenjuju se članovi 60 i 102 ovog zakona (stav 3).

Odredbama člana 102 Zakona o stečaju je propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u "Službenim novinama Federacije BiH", pozvati povjerioci i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija (stav 7), a ako u roku iz stava 7 ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak (stav 8).

Slijedom svega navedenog, supsidijarnom primjenom odredaba člana 102 stavovi 7 i 8 Zakona o stečaju u vezi sa odredbama člana 196 stavovi 2 i 3 Zakona o stečaju, sud je donio odluku kao u dispozitivu.

Pouka o pravu na izjavljivanje pravnog lijeka:
Protiv ovog rješenja nije dozvoljen pravni lijek.

Stečajni sudija
Vedran Milašinović